



# AGAX ASOCIACIÓN GALEGA DE AXEDRECISTAS

C.I.F. G-15228844

Apartado de Correos 769 - 15080 A Coruña

Teléfonos: 981 150 168 - 608 084 705

www.agax.org - correo electrónico: correo@agax.org

## Preámbulo:

A ASOCIACIÓN GALEGA DE AXEDRECISTAS (AGAX), celebrou a súa xuntanza fundacional o 16 de xuño de 1989, aprobando as normas que gobernaron dende entón esta entidade. Os presentes estatutos foron aprobados pola Asemblea celebrada o 21 de setembro de 2012.

## Estatutos da ASOCIACIÓN GALEGA DE AXEDRECISTAS (AGAX)

### CAPÍTULO I DA ASOCIACIÓN EN XERAL

#### Artigo 1º

1.1. Procédese a adapta-los estatutos da asociación denominada ASOCIACIÓN GALEGA DE AXEDRECISTAS (AGAX) con número de inscrición realizado o 1 de setembro de 1989 no Rexistro do Ministerio de Interior 88.357 de asociacións sen ánimo de lucro e CIF G-15228844

1.2. A asociación rexeráse polos devanditos estatutos, pola Lei orgánica 1/2002, do 22 de marzo, reguladora do dereito de asociacións e pola demais lexislación existente en materia de asociacións que lle sexa aplicable.

1.3. Poderá empregar as denominacións "Asociación Galega de Xadrecistas" e "Asociación Gallega de Ajedrecistas" en función do idioma e sen prexuízo do seu nome histórico e oficial, que será o empregado nas relacións coa administración e documentación formal.

#### Artigo 2º

O domicilio principal e permanente da ASOCIACIÓN GALEGA DE AXEDRECISTAS (AGAX) radicará na localidade da Coruña, na rúa do xxxxxxxxxxxx, 15005 A CORUÑA.

Outros datos de contacto aparecen na cabeceira da presente folla.

#### Artigo 3º

A asociación en funcións dos seus fins e do emprazamento do seu domicilio social, exercerá fundamentalmente as súas actividades no ámbito territorial de Galicia.

#### Artigo 4º.

4.1. A asociación constitúese por tempo indefinido e só se disolverá, conforme o disposto nestes estatutos e pola vontade dos asociados expresada en Asemblea Xeral Extraordinaria convocada ao efecto ou ben polas causas previstas na lexislación vixente.

4.2. A ASOCIACIÓN GALEGA DE AXEDRECISTAS (AGAX) rexeráse segundo os principios democráticos contidos no marco da Constitución e o resto do ordenamento xurídico.

De abaixo a arriba:  
Ernesto Pérez  
Santiago Domínguez  
Manuel Andión  
Francisco Conde  
Florencio González

### **Artigo 5º**

**5.1.** A **ASOCIACIÓN GALEGA DE AXEDRECISTAS (AGAX)** ten como fin principal proporcionar aos seus asociados e simpatizantes actividades culturais, científicas e recreativas, tendo como base o xadrez e outros xogos de estratexia. Como asociación cultural completa estes xogos non serán o único campo de actuación, aínda que si o principal. Para outras actividades coordinará con diferentes entidades culturais e/ou deportivas.

**5.2.** Para cumprir o seu obxectivo a **ASOCIACIÓN GALEGA DE AXEDRECISTAS (AGAX)** levará a termo unha gran variedade de actividades; cursos, certames, becas de apoio a investigadores, publicacións, etc. co fin de afondar na longa historia do xadrez e outros xogos clásicos de estratexia.

**5.3.** Os ingresos que se obteñan por calquera concepto destinaranse exclusivamente ao cumprimento destes fins, sen que se poidan repartir entre os asociados nin outras persoas físicas ou xurídicas con interese lucrativo.

---

## **CAPÍTULO II DOS ASOCIADOS**

### **Artigo 6º**

**6.1.** Poderán ser integrantes da **ASOCIACIÓN GALEGA DE AXEDRECISTAS (AGAX)** todas aquelas persoas físicas, con plena capacidade de obrar e as persoas xurídicas tralo acordo do seu órgano competente, que non teñan débedas pendentes coa asociación e que reciban a aprobación dos órganos de goberno da **ASOCIACIÓN GALEGA DE AXEDRECISTAS (AGAX)** do xeito determinado nestes estatutos.

**6.2.** Poderán ser integrantes da asociación na súa sección xuvenil, os menores non emancipados de máis de 14 anos co consentimento, documentalmente acreditado, das persoas que deban supli-la súa capacidade.

**6.3.** Os acordos de admisión de novos membros tomaraos o órgano correspondente segundo queda determinado nestes estatutos.

### **Artigo 7º**

Dentro da asociación poderán existilas seguintes clases de asociados:

**Fundador;** aquelas persoas que subscribiron a acta fundacional.

**De Número;** aquelas persoas que ingresaron con posterioridade á subscrición da acta fundacional e que leven máis de dous anos consecutivos de asociados, sendo admitidos pola Asemblea Xeral a proposta da Xunta Directiva.

**Colaborador;** aquelas persoas que ingresaron con posterioridade á subscrición da acta fundacional e non reúnan as condicións dos socios de número.

**De Honra;** aquelas persoas que, a xuízo da Asemblea Xeral, e a proposta do Presidente, tiveran axudado de xeito notable ao desenvolvemento dos fins da asociación.

**Xuvenil;** aquelas persoas menores de 18 anos que participen na asociación, que estarán integradas na sección xuvenil. Cumpridos os 18 anos pasarán á ser socios colaboradores, ou de número se levando dous anos continuos como socios así o determina a Asemblea Xeral.

## **Artigo 8º**

**8.1.** A condición de asociado pérdese:

- a) Por vontade propia.
- b) Por falta de pago da cota anual.
- c) Por incumprimento das súas obrigas ou a realización de accións que prexudiquen gravemente aos intereses da **ASOCIACIÓN GALEGA DE AXEDRECISTAS (AGAX)**, previo expediente disciplinario, con audiencia do interesado.
- d) Por falecemento da persoa física ou extinción da persoa xurídica.
- e) No caso de socios de honra, polo acordo da Asemblea Xeral, que non poderá ser recorrido.

**8.2.** A expulsión de membros no suposto do apartado b) do parágrafo anterior, será acordada pola Xunta Directiva, logo da audiencia do interesado. O acordo de expulsión deberá ser ratificado pola Asemblea Xeral Extraordinaria e contra a súa resolución poderase recorrer ante a xurisdicción ordinaria.

## **Artigo 9º**

**9.1.** Os membros da **ASOCIACIÓN GALEGA DE AXEDRECISTAS (AGAX)** teñen os seguintes dereitos:

1. Participar nas actividades da asociación e nos órganos de goberno e representación, exerce-lo dereito de voto, así como asistir á Asemblea xeral, de acordo cos estatutos.
2. Ser informado da composición dos órganos de goberno e representación da asociación, do seu estado de contas e do desenvolvemento da súa actividade.
3. Ser oído con carácter previo á adopción de medidas disciplinarias contra el e ser informado dos feitos que dean lugar ás ditas medidas, debendo motivarse o acordo que, no seu caso, impoña a sanción.
4. Impugna-los acordos dos órganos da asociación que estime contrarios á lei ou aos estatutos.

**9.2.** Os asociados e asociadas colaboradores, de honra e xuvenís non intervirán na dirección da asociación nin nos órganos de representación dela. Estarán, nembargantes, todos eles facultados para asistir ás asembleas xerais con voz, pero sen voto. Os socios xuvenís poderán ser organizados nunha sección xuvenil en regulamento interno acordado pola Asemblea.

## **Artigo 10º**

Son obrigas dos membros da **ASOCIACIÓN GALEGA DE AXEDRECISTAS (AGAX)**:

1. Comparti-las finalidades da asociación e colaborar para a súa consecución.
2. Paga-la cotas que se establezan, salvo no caso dos socios de honra que estarán exentos.
3. Desempeña-los cargos para os que foron elixidos.
4. Acatar e cumprí-los acordos validamente adoptados polos órganos de goberno e representación da asociación.
5. Acata-lo contido dos estatutos.
6. Ter unha boa conducta individual e cívica.

---

## **CAPÍTULO III**

### **DOS ÓRGANOS DA ASOCIACIÓN**

#### **Artigo 11º**

A dirección e administración da asociación serán exercidas polo presidente, a Xunta Directiva e a Asemblea Xeral.

#### **Artigo 12º**

**12.1.** O presidente da asociación será designado pola Asemblea Xeral entre os seus membros e o seu mandato durará 4 anos. Será asistido nas súas funcións por un vicepresidente, que o substituirá nos casos de vacante, ausencia ou enfermidade.

**12.2.** O presidente terá as seguintes atribucións:

- a) Representa-la asociación diante de calquera organismo público ou privado.
- b) Convocar e presidi-las sesións que celebre a Xunta Directiva; presidi-las sesións da Asemblea Xeral; dirixi-las deliberacións dunha e outra, non tendo voto nas mesmas, salvo o de calidade, en caso de empate.
- c) Executa-los acordos adoptados pola Xunta Directiva e a Asemblea Xeral.
- d) Ordena-los pagamentos acordados validamente.
- e) Asina-las actas, certificados, pagos e outros documentos da asociación xunto co secretario ou membro da Xunta Directiva a quen lle corresponda a elaboración do documento de que se trate.

#### **Artigo 13º**

**13.1.** A Xunta Directiva estará formada polo presidente da asociación, un vicepresidente, un secretario, un tesoureiro e os vocais que o presidente considere oportuno.

**13.2.** Os cargos que compoñen a Xunta Directiva serán desempeñados de forma gratuíta, sen prexuízo do dereito a ser reembolsados dos gastos debidamente xustificadas en que poidan incurrir por actuacións relacionadas coa asociación. As persoas elixidas para estes cargos deberán carecer de interese económico nos resultados da actividade levada a cabo pola asociación.

**13.3.** A Asemblea Xeral é a competente para elixi-los cargos da Xunta Directiva. A súa duración será igual que o mandato do presidente, cesando co mesmo, aínda que todos poden ser obxecto de reelección indefinidamente.

**13.4.** Os cargos cesarán na súa función por:

- a) falecemento da persoa física ou extinción da persoa xurídica.
- b) renuncia voluntaria.
- c) transcurso do prazo para o que foron elixidos.
- d) acordo de cesamento de toda a Xunta Directiva adoptado por 2/3 dos asociados reunidos en Asemblea Xeral Extraordinaria convocada para tal efecto.

A renuncia e o transcurso do prazo non dan lugar ao cese automático, senón que se deberá facer un efectivo traspaso de poderes con entrega de documentación e posta ao día do sucesor.

As vacantes que se puideran producir durante o mandato de calquera dos membros da Xunta Directiva, serán cubertas provisoriamente polas persoas que designe o presidente ata a confirmación pola Asemblea Xeral. En calquera caso, a Xunta Directiva debe estar integrada como mínimo por 3 persoas, que exercerán as funcións de presidente, secretario e tesoureiro.

### **Artigo 14º**

A Xunta Directiva terá as seguintes atribucións:

1. Programar e dirixi-las actividades asociativas.
2. Leva-la xestión administrativa e económica da asociación.
3. Someter á aprobación da Asemblea Xeral o orzamento anual de ingresos e gastos, así como o estado de contas do ano anterior.
4. Convocar e fixa-la data da Asemblea Xeral.
5. Propoñer á Asemblea Xeral a fixación de cotas ordinarias e extraordinarias para os asociados.
6. Designa-las comisións de traballo ou seccións que se estimen oportunas para o bo funcionamento da asociación.
7. Ditar normas interiores de organización e exercer cantas funcións non estean expresamente asignadas á Asemblea Xeral.
8. Resolver sobre as solicitudes de ingreso de novos asociados.
9. Propoñe-lo plan de actividades da asociación á Asemblea Xeral para a súa aprobación, impulsando e dirixindo as súas tarefas.
10. Resolve-los procedementos disciplinarios que se instrúan.
11. Aquelas que non veñan atribuídas expresamente á outro órgano da asociación.

### **Artigo 15º**

**15.1.** A Xunta Directiva será convocada polo presidente, a iniciativa propia ou a petición de calquera dos seus compoñentes.

**15.2.** Para que os acordos da Xunta Directiva sexan válidos, deberán ser adoptados pola maioría de votos dos asistentes, sendo necesaria a concorrencia, polo menos, da metade máis un dos seus membros e, en todo caso, do presidente ou vicepresidente e o secretario ou persoa que o substitúa.

**15.3.** O secretario ou, no seu defecto, o directivo que o substitúa, levantará acta das sesións, que se transcribirá ao libro de actas.

### **Artigo 16º**

Os membros da Xunta Directiva presidirán as comisións que a propia Xunta acorde constituír, co fin de delegar nelas a preparación de determinados actos ou actividades, ou de acadar delas as informacións necesarias. Formarán parte das ditas comisións o número de asociados que acorde a Xunta Directiva, a proposta dos seus respectivos presidentes.

### **Artigo 17º**

A Asemblea Xeral é o órgano de expresión da vontade da asociación e estará formada por tódolos integrantes da mesma coas. O presidente e o secretario da asemblea serán tamén o presidente e secretario da Xunta Directiva.

### **Artigo 18º**

A Asemblea Xeral da **ASOCIACIÓN GALEGA DE AXEDRECISTAS (AGAX)** reunirse con carácter ordinario como mínimo unha vez ao ano, e con carácter extraordinario cantas veces o acorde a Xunta Directiva, ou o soliciten o 10% dos socios. Neste último caso realizarse por medio de escrito dirixido ao presidente, autorizado coas firmas dos solicitantes, no que se expoña o motivo da convocatoria e a orde do día.

### **Artigo 19º**

A Asemblea Xeral Ordinaria reunirase necesariamente no período que vai desde o mes de febreiro ata o de maio. Tanto a Asemblea Ordinaria como a Extraordinaria serán convocadas con 15 días de antelación polo/a presidente/a da Xunta Directiva.

A notificación farase pública nos órganos de difusión da **ASOCIACIÓN GALEGA DE AXEDRECISTAS (AGAX)** e tamén mediante correo aos socios.

### **Artigo 20º**

Serán competencias da Asemblea Xeral Ordinaria:

1. Aproba-lo plan de actividades.
2. Examinar e aproba-las contas e balances do exercicio anterior.
3. Aproba-los presupostos de ingresos e gastos para cada exercicio.
4. Exame e aprobación das cotas.

### **Artigo 21º**

Serán competencias da Asemblea Xeral Extraordinaria:

1. Modifica-los estatutos da asociación.
2. Elixir e cesa-los membros integrantes da Xunta Directiva.
3. Aproba-la federación con outras asociacións.
4. Autoriza-lo alleamento, gravame ou hipoteca de bens sociais.
5. Acorda-la disolución da asociación.
6. Designa-los/as liquidadores/as.
7. Ratifica-la expulsión de asociados e asociadas a proposta da Xunta Directiva.
8. Solicita-la declaración de utilidade pública da asociación.
9. Aproba-lo regulamento de réxime interno da asociación.
10. As que sendo de competencia da asemblea ordinaria, por razóns de urxencia ou necesidade, non poidan espera-la súa convocatoria, sen grave prexuízo para a asociación.
11. Tódalas competencias non conferidas expresamente á Asemblea Xeral Ordinaria ou á Xunta Directiva.

### **Artigo 22º**

A Asemblea Xeral da **ASOCIACIÓN GALEGA DE AXEDRECISTAS (AGAX)** quedará validamente constituída sempre que concorran a metade máis un dos seus membros na primeira convocatoria ou transcorrida media hora en segunda convocatoria, con calquera número de asistentes pero, en todo caso, coa asistencia do presidente ou vicepresidente e o secretario ou persoa que o substitúa.

### **Artigo 23º**

Os acordos adoptados deberán selo polo voto afirmativo da maioría simple dos asistentes ou representados, excepto os relativos os apartados 1 ao 9 do artigo 21º, que requirirán maioría de dous terzos. A continuación levaranse os acordos ao libro de actas e asinará o/a presidente, o/a secretario/a da asemblea. A acta deberá ser lida na seguinte sesión celebrada pola Asemblea Xeral e aprobada por maioría dos presentes.

#### **Artigo 24º**

Os acordos adoptados conforme os preceptos anteriores obrigarán a tódolos/as asociados/as, incluso aos/ás non asistentes.

As sesións abriranse cando así o determine o presidente. Seguidamente se procederá por parte do secretario á lectura da acta da Asemblea anterior que deberá ser aprobada.

Posteriormente o secretario procederá a presentar a orde do día. Cada punto será informado polo membro da Xunta Directiva que lle corresponda, procedéndose ao debate e a aprobación dos correspondentes acordos nos termos contidos nestes estatutos, segundo a materia de que se trate.

#### **Artigo 25º**

Os acordos que vaian contra estes estatutos ou infrinxan os fins da asociación poderán ser recorridos en reposición diante da Asemblea Xeral. A partir da resolución do recurso de reposición, quedará expedita a vía para recorrer perante a xurisdicción ordinaria

#### **Artigo 26º**

**26.1.** O secretario recibirá e tramitará as solicitudes de ingreso, levará o ficheiro e o libro rexistro de asociados e terá ao seu cargo a dirección dos traballos administrativos da entidade. Correspóndelle así mesmo notificar as convocatorias e custodiar as actas e expedir certificacións desta co visto e praxe do presidente. O secretario tamén levará o inventario dos bens da asociación nun libro establecido para este efecto.

**26.2.** Nos casos de ausencia, vacante ou enfermidade do secretario, o presidente designará entre os directivos a un que desenvolva esta función.

#### **Artigo 27º**

**27.1.** O tesoureiro recadará e custodiará os fondos pertencentes á asociación, dará cumprimento ás ordes de pagamento que expida o presidente, levará a contabilidade da asociación, tomará razón e levará conta dos ingresos e dos gastos asociativos, elaborará o borrador de orzamentos da asociación así como as contas de resultados e balances.

**27.2.** O tesoureiro ten a obriga de proceder ao peche do exercicio orzamentario de xeito tal que permita que as contas estean a disposición dos membros da asociación nos quince días anteriores á celebración da Asemblea Ordinaria.

#### **Artigo 28º**

Os vocais terán as seguintes atribucións:

1. Realizar programas e propostas na súa área de actuación.
2. Desempeña-los traballos que lle sexan encomendados pola Xunta Directiva.

---

## **CAPÍTULO IV RÉXIME ECONÓMICO**

#### **Artigo 29º**

A asociación foi fundada sen dispor de patrimonio propio. O peche do exercicio económico coincidirá co do ano natural.

### **Artigo 30º**

A asociación funcionará en réxime de presuposto anual, con partidas diferenciadas de ingresos e gastos. O borrador de presuposto será elaborado polo tesoureiro da asociación, que deberá de telo preparado antes do un de xaneiro de cada ano, co fin de que poida ser aprobado na Asemblea Xeral Ordinaria.

### **Artigo 31º**

A asociación manterase dos seguintes recursos:

1. As cotas periódicas dos/as asociados/as.
2. As cotas extraordinarias que propoña a Xunta Directiva e sexan aprobadas pola Asemblea.
3. As doazóns ou subvencións que poidan conceder órganos públicos, entidades privadas ou particulares.
4. Os ingresos que se poidan recibir polo desenvolvemento das actividades da asociación.
5. Calquera outro ingreso admitido pola normativa vixente para actividades non lucrativas.

### **Artigo 32º**

A Asemblea Xeral Ordinaria, a proposta da Xunta Directiva, aprobará tanto as cotas ordinarias como as extraordinarias que non serán reintegrables en ningún caso. O recadado dedicarase a atender as necesidades da asociación.

### **Artigo 33º**

Anualmente con referencia ao último día do exercicio económico de cada ano, elaboraranse as contas, que se formalizarán nunha memoria, que será posta a disposición dos/as asociados/as, durante un prazo non inferior a 15 días ao sinalado para a celebración da Asemblea Xeral Ordinaria, que deberá aprobarlas ou censuralas.

### **Artigo 34º**

Para a disposición de fondos das contas que a asociación ten nas entidades bancarias será necesaria a sinatura conxunta do presidente e do tesoureiro.

### **Artigo 35º**

Como entidade sen ánimo de lucro, en ningún caso poderán ser distribuídos entre os/as asociados/as os recursos obtidos pola asociación.

---

## **CAPÍTULO V**

### **DO REGULAMENTO DE RÉXIME INTERNO**

#### **Artigo 36º**

O regulamento de réxime interno, no seu caso, desenvolverá aquelas materias non contempladas directamente nos presentes estatutos, como o procedemento de elección dos membros da Xunta Directiva e o procedemento disciplinario, non podendo ir en ningún caso en contra do estipulado neles. En todo caso, o funcionamento interno da asociación estará sometido ao ordenamento xurisdiccional civil.



---

## **CAPÍTULO VI MODIFICACIÓN DE ESTATUTOS E DISOLUCIÓN DA ASOCIACIÓN**

### **Artigo 37º**

Os presentes estatutos só poderán ser modificados por acordo da Asemblea Xeral Extraordinaria convocada para tal efecto, adoptado polas 2/3 partes dos asociados. A proposta de convocatoria deberá ir acompañada do texto das modificacións propostas.

### **Artigo 38º**

A asociación disolverase voluntariamente por acordo dos asociados adoptado pola unanimidade dos asistentes á Asemblea Xeral Extraordinaria convocada para tal efecto.

### **Artigo 39º**

Acordada a disolución, a Asemblea Xeral extraordinaria designará tres asociados/as liquidadores, que xunto o/a presidente e o/a tesoureiro/a, procederán a efectuar a liquidación dos bens, pagando débedas, cobrando créditos e fixando o haber líquido resultante.

### **Artigo 40º**

O haber resultante unha vez efectuada a liquidación, doarase a Asociación de Entidades Culturais e Deportivas de Galicia, CIF G15310188. O xustificante da doazón será presentado no Rexistro de Asociacións correspondente para proceder á inscrición da disolución da asociación.

---

## **DECLARACIÓN FINAL**

**Don Manuel Andión Muínelo**, na súa calidade de secretario da **ASOCIACIÓN GALEGA DE AXEDRECISTAS (AGAX)** fai constar que estes estatutos modificados en Asemblea Xeral Extraordinaria celebrada o 21 de setembro de 2012, son para cumprir cos requisitos establecidos na disposición transitoria primeira da Lei orgánica 1/2002, de 22 de marzo, reguladora do dereito de asociación.

A Coruña, 21 de setembro de 2012